

Uunga allannguutissatut siunnersuut:

Uunga siunnersuut:

Meeqqanut suli atualinngitsunut perorsaannikkut inerikkiartuutaasunik ulluunerani neqeroorutit pillugit Inatsisartut Inatsisaat

Naalakkersuisunit saqqummiunneqartoq

§§ 1-46-mut

1. §§ 1-46 imatut oqaasertalerneqassapput:

” *Siunertaq*

§ 1. Inatsisartut inatsisaat manna tunngavigalugu meeqqanik atualerneqanngitsunik perorsaanermik suliaqarnerit tamarmik meeraq qitiutillugu meeqqamik angajoqqaatut oqartussaassuseqartut, pilersuisuiusut meeqqallu attaveqaatai suleqatigalugit ingerlanneqassapput.

§ 2. Inatsisartut inatsisaanni matumani anguniagassat tullinnguuttut naammassineqarnissaat siunertarineqarpoq:

- 1) Persorsaanermik sulinermi meeqqap atugarissaarnera, ilikkariartornera aamma inooqataanikkut nalinginnaasumillu piginnaasaasa ineriartornerat kiisalu meeqqap atualernissamut piareersimanerata qulakkeernissaa pillugit meeqqamut pitsaanerpaamik qulakkeerinnineq.
- 2) Meeqqap takorluuisinnaaneranut, pinngorartitsisinnaaneranut, ineriartorneranut pinngortitamullu ataqqinninneranut uummarissaaqataasunik meeqqap misigisaqarnissaanut sammisaqarnissaanullu periarfissiineq.
- 3) Meeqqap inoqatiminut ataqqinninnissamik paasinninnissaanik, kulturikkut kinaassutsimik paasinninnermik, kisiannili aamma meeqqap kulturianit allaanerusemik kulturimik paasinninneranik ineriartortitsinermik siuarsaaneq.
- 4) Paasinninneq, eqqissineq, akaarinninneq, suaassutsit akornanni naligiissitaaneq, inuiaassuseq upperisaqarnerlu anersaaralugit inuiaqatigiinni kiffaangissuseqartumi akisussaassuseqartumik inuunissamut meeqqap piareersarneqarnera.
- 5) Meeqqamut aalajangeeqataasinnaanermik, akisussaaqataanermik oqartussaaqataanermillu paasinninnermik misigisaqarnermillu tunisineq.
- 6) Neqeroorutit akornanni ikaarsaarnernut meeqqap sapinngisamik pitsaanerpaamik piareersarneqarnissaa taamaalillunilu meeqqap ukiuanut naleqquttumik ineriartornissaa siuarsarniarlugu ataqatigiissumik ataavartumillu pilersitsisoqarnissaanik isumaginninneq.
- 7) Perorsaanermik neqeroorutit kommunimi meeqqanut nalinginnaasumik ataatsimut neqeroorutaatinnerisigut peqataatitsinermik isumaginninnikkullu ajornartorsiuteqarnissamut aarlerinaartorsiornissaq pinaveersaartitsinermik qulakkeerinnineq, taamaasilluni meeqqanut

immikkut iliuseqarnissamik pisariaqartitsisunut pinaveersaartitsinernut ikorfartuisumillu iliuseqarneqarnissamik qulakkeerinnineq.

Atuuffia nassuiaatillu

§ 3. Inatsisartut inatsisaat una meeqqanut atualerneqanngitsunut tamanut ulluunerani neqeroorutini atuuppoq.

Imm. 2. Meeqqanut ulluunerani persorsaaniikkut inerikkiartuutaasumik neqeroorutinit angerlarsimaffimmi paarsineq, angerlarsimaffimmi paarsisarfiit ataatsimoortitat, ulluunerani paaqqinnittarfiit kiisalu sammisassaqartitsinermik neqeroorutit meeqqanik sullissinermik sammisunik persorsaaniikkut ingerlatsiviusut ilaapput. Neqeroorut ulloq naallugu ullulluunniit ilaannaani neqeroorutaanersoq apeqqutaanngilaq.

Imm. 3. Meeqqat atualerneqanngitsut tassaapput 0-6-inik ukiullit, imaluunniit atuartinneqartussaanerup atuutilernissaata tungaanut.

Imm. 4. Inatsisartut inatsisaanni meeqqanut atualerneqanngitsunut, akimmiffiit assigiinngitsut sunniivigeqatigiinnerisigut meeqqat allat assigalugit inuiaqatigiinni tamakkiisumik sunniutilimmillu inooqataasinnaannginnerannik pissutaasinnaasumik inooqataaniikkut ajornartorsiuteqarneq, ataavartumik timikkut, tarnikkut, paasinnissinnaaniikkut malussarniutitigulluunniit pisinnaasat annikillisisanerat pissutigalugu immikkut ittumik iliuseqarfigineqarnissamik pisariaqartitsisunut aamma tunngassuteqarpoq.

§ 4. Angerlarsimaffimmi paarsisarfik tassaavoq persorsaaniikkut kaammattuiffiusumik paarsinissamik neqeroorut ullup-unnuallu ilaa angerlarsimaffimmi meeqqap angerlarsimaffiginngisaani, imaluunniit tamanit katersuuttarfimmi ingerlanneqartoq.

Imm. 2. Kommunip angerlarsimaffimmi paarsisarfia tassaavoq angerlarsimaffimmi paarsineq kommunimit pilersinneqarlunilu ingerlanneqartoq, angerlarsimaffimmi paarsisoq kommunimit atorfinitsinneqarlunilu aningaasarsiaqartinneqartoq.

Imm. 3. Namminerisamik angerlarsimaffimmi paarsisarfik tassaavoq angerlarsimaffimmi paarsisarfik nammineq pilersitaallunilu akilerneqarluni ingerlanneqartoq. Namminerisamik angerlarsimaffimmi paarsisarfik kommunip angerlarsimaffimmi paarsisarfiutaani malittarisassat assigalugit ingerlassaaq.

Meeqqat ataasiakkaat pillugit suleqatigiinneq

§ 5. Kommunalbestyrelsimit meeqqat ataasiakkaat attaveqarfiisa akornanni ataqatigiissakkamik suleqatigiittoqarnissaa qulakkeerneqassaaq. Pisariaqartitsisoqartillugu ingerlatsiviit ataasiakkaat meeqqamik sulinermut toqqaannartumik attuumassuteqartut akornanni inuttalerneqartumik suleqatigiinnik kommunalbestyrelse pilersitsissaaq.

Imm. 2. Suleqatigiit suliassaqarfiit akornanni imm. 1 naapertorlugu suleqatigiinnermut atatillugu attaveqarfiit ataatsimiitinneqartassapput, tamatumani meeqqap angajoqqaatut oqartussaasui imaluunniit pilersuisiviusui, meeqqamut siusissukkut iliuseqarnissaaq siunertaralugu peqataatinneqassallutik.

Imm. 3. Naalackersuisut suleqatigiinnik pilersitsinermut malittarisassanik aalajangersaassapput.

Kapitali 2

Inissanik innersuussineq

§ 6. Nunami maani angajoqqaat inatsisitigut akuerineqarlutik najugaqartut Inatsisartut inatsisaat manna malillugu ulluunerani neqeroorummi inissamik pisinnaatitaaffeqarput.

§ 7. Meeqqanut atualerneqanngitsunut tamanut ulluunerani neqeroorummik qulakkeerinissaq kommunalbestyrelsip suliasaraa.

§ 8. Kommunalbestyrelse kommunip ulluunerani paaqqinnittarfiinut kommunillu angerlarsimaffimmi paarsisarfiinut piumasaqaatit kommunimit aalajangersarneqarsimasut malillugit meeqqanut utaqqisut allattorsimaffianniittunut inissamik innersuussisassaaq.

§ 9. Meeqqat 0-2-nik ukiullit meeraaqqerivinnut kommunillu angerlarsimaffimmi paarsisarfiinut meeqqallu 3-6-inik ukiullit meeqqerivinnut kommunillu angerlarsimaffimmi paarsisarfiinut kommunalbestyrelsip innersuuttassavai.

Imm. 2. Kommunalbestyrelse marlunnik ukiulinnik meeqqamut pitsaanerpaamut ineriartorneranullu meeqqanik ataasiakkaanik aalajangersimasunik naliliineq tunngavigalugu meeqqerivimmut innersuussisinnaavoq.

§ 10. Angajoqqaat inatsit una naapertorlugu meeqqamut ataatsimut inissamik ataasimik taamaallaat tunineqarsinnaapput.

Utaqqisunut allattorsimaffik

§ 11. Qinnuteqartut tamarmik inissaqartinneqanngippata utaqqisunut allattorsimaffimmik kommunalbestyrelse pilersitsissaaq.

§ 12. Utaqqisunut allattorsimaffimmi pingaarnersiuinissamut piumasaqaatinik kommunalbestyrelse aalajangersaassaaq.

Imm. 2. § 3, imm. 4 naapertorlugu meeqqat immikkut pisariaqartitsisut salliutinneqassapput.

§ 13. Utaqqisunut allattorsimaffimmut piumasaqaatit kommunalbestyrelsip meeqqat inuusuttullu pillugit politikiani allassimassapput, taakku kikkunnit tamanit pissarsiarineqarsinnaassapput.

Imm. 2. Naalackersuisut pingaarnersiuinermut piumasaqaatinut malittarisassanik erseqqinnerusunik aalajangersaasinnaapput.

Kapitali 3

Ulluunerani paaqqinnittarfiit

§ 14. Ulluunerani paaqqinnittarfiit paaqqinnittarfiupput meeqqanut eqimattanut sammisumik perorsaanermik ilinniarsimasunik sulisoqartut, illutaat meeqqanut sulisunullu naleqqussagaallutik attuumassutilimmillu oqartussaasunit akuerineqarsimallutik.

Imm. 2. Ulluunerani paaqqinnittarfiit kommunineersuusinnaapput imaluunniit 6-inik amerlanerusunilluunniit meerartalinnik paaqqinnittarfittut imminnut pigisutut pilersinneqartuusinnaapput, taakku kommunalbestyrelsimik ingerlatsinermik isumaqatigiissusiorsinnaapput.

§ 15. Ulluunerani paaqqinnittarfiit 0-2-nik ukiulinnut meeraaqqerivittut, 3-6-inik ukiulinnut meeqqerivittut imaluunniit 0-6-inik ukiulinnut ukiui naapertorlugit avitanut paaqqinniffittut pilersinneqassapput.

Imm. 2. Ulluunerani paaqqinnittarfiit meeqqanut eqimattanut agguarneqassapput, meeqqanut eqimattat tamarmik amerlanerpaamik 20-nik meerartaqassallutik, meeraaqqerivinnilu eqimattat amerlanerpaamik aqqaneq marlunnik meerartaqassallutik.

Imm. 3. Ulluunerani paaqqinniffik suleqatigalugu aalajangersimasumik naliliinera tunngavigalugu imm. 2 naapertorlugu meeqqanut amerlanerpaaffiliinernut immikkut akuersissuteqartoqarsinnaavoq.

Imm. 4. §§ 1 aamma 2 naammassisinnaajumallugu ulluunerani paaqqinnittarfinni inissat qanoq amerlatigisut meeqqanut immikkut pisariaqartitsisunut tunniunneqassanersut pillugit paaqqinnittarfiup innersuussuteqarneratigut kommunalbestyrelsip imaluunniit ulluunerani paaqqinnittarfimmi immiinnut pigisumi siulersuisut aalajangiinerat tunngavigalugu amerlassusilerneqassapput. Meeraq pillugu § 5 naapertorlugu suleqatigiinnik pilersitsisoqarsimappat aalajangiinermut atatillugu suleqatigiit peqataatinneqarsinnaapput.

Ulluunerani paaqqinnittarfiit illutaannut piunasaqaatit

§ 16. Ulluunerani paaqqinnittarfiup atulerseqqaarnerani kommunalbestyrelse ulluuneranik paaqqinnittarfik akuersissaaq. Illup allangortinneqarneranut inissallu qanoq amerlatiginissaannut aalajangiunneqarsimasut allangortinneqarnerannut atatillugu ulluunerani paaqqinnittarfimmi kingorna allanguutinut kommunalbestyrelse akuersissaaq.

Imm. 2. Ulluunerani paaqqinnittarfiup inatsisit atuuttut naapertorlugit aaqqissorneqarsimanersooq kommunalbestyrelsimit nakkutigineqassaaq.

Imm. 3. Naalakkersuisut ulluunerani paaqqinnittarfinnik pilersitsinermut aaqqissuussinermullu malittarisassanik aalajangersaassapput.

Ulluunerani paaqqinnittarfiit akuerisaanerannut uppernarsaat

§ 17. Ulluunerani paaqqinnittarfiit tamarmik kommunalbestyrelsimit tunniunneqarsimasumik akuerisaasimanermut takussutissaqassapput, ulluunerani

paaqqinnittarfiup aqutsisuaniiit ulluunerani paaqqinnittarfimmi takuneqarsinnaasumut inissinneqarsimasussamik.

Imm. 2. Akuerisaasimanermut uppernarsaat paasissutissanik ukuninnga imaqaassaaq:

- 1) Ulluunerani paaqqinnittarfiup aqqa, sumiiffia inissisimanageralu.
- 2) Ulluunerani paaqqinnittarfiup anguniagai meeqqanillu isiginnittaasia.
- 3) Ulluunerani paaqqinnittarfiup aqutsisua.
- 4) Kommunimi ataatsimiititaliaq naapertuuttoq imaluunniit ulluunerani paaqqinnittarfiup imminut pigisup siulersuisui.
- 5) Paaqqinnittarfimmi inissat amerlassusaat.
- 6) Sulisut amerlassusaat.
- 7) Ammasarfiit.
- 8) Oqartussaasunit naapertuuttunit akuersissutit, tamatumani qatserisartoqarnermi oqartussat, sanaartornermut oqartussat aamma kommunalbestyrelse kiisalu ullulenera ilanngullugit.
- 9) Ulluunerani paaqqinnittarfimmi persorsaaniikkut ukiumoortumik pilersaarutip sumiinnera inatsisitigullu tunngaviit naapertuuttut pillugit paasissutissat.

Atorfinitsitsinerit

§ 18. Kommunalborgestrelse innersuussisarnermut ataatsimiititaliamit ulluunerani paaqqinnittarfimmit pineqartumit, angajoqqaat siulersuisuinit ingerlatsivimmiillu sinniisulimmik, innersuussuteqartoqareerneratigut ulluunerani paaqqinnittarfimmi kommunip ingerlataani aqutsisumik atorfinitsitsissaaq. Innersuussisarnermut ataatsimiititaliaq kommunalborgestrelsimit pilersinneqassaaq.

Imm. 2. Kommunalborgestrelse ulluunerani paaqqinnittarfimmi sulisunik aqutsisunillu atorfinitsitsinerminut atatillugu, atorfik meeqqanik attaveqarnermik nassataqarpat, meeqqanik pinerliisimannginnermut pineqaatissinneqarsimannginnermillu uppernarsaatiniq piniassaaq kiisalu pineqartup suliassai eqqarsaatigalugit uppernarsaatiniq sukumiisumik nalilersuissalluni. Kommunalborgestrelse immikkut pisoqartillugu pineqaatissinneqarsimannginnermik aamma meeqqanik pinerliisimannginnermut uppernarsaatiniq nutaanik piniarsinnaavoq.

Imm. 3. Ulluunerani paaqqinnittarfimmi aqutsisumik sulisumilluunniit atorfinitsitsisoqarsinnaangilaq:

- 1) pineqaatissinneqarsimannginnermik uppernarsaammi takuneqarsinnaappat, qinnuteqartoq ukiut kingulliit 10-t iluanni kinguaassiutitigut pinerluuteqarsimasutut imaluunniit inunnut navianaatilimmik pinerluuteqarsimasutut eqqartuunneqarsimappat, imaluunniit
- 2) meeqqanik pinerliisimannginnermut uppernarsaammi takuneqarsinnaappat, qinnuteqartoq kinguaassiutitigut pinerluuteqarsimasutut eqqartuunneqarsimappat.

Ulluunerani paaqqinnittarfimmi aqutsisoq

§ 19. Ulluunerani paaqqinnittarfimmi aqutsisup ulluunerani paaqqinnittarfiup illersorneqarsinnaasumik malittarisassallu atuuttut naapertorlugit ingerlanneqarnissaa

perorsaanikkut allaffissornikkullu akisussaaffigaa. Ulluunerani paaqqinnittarfimmi aqutsisup sulisoqarnikkut atugassarititaasut akisussaaffigai.

Imm. 2. Ulluunerani paaqqinnittarfimmi aqutsisup ulluunerani paaqqinnittarfimmi perorsaanikkut ukiumut pilersaarusiornissaq missingersuusiornissarlu akisussaaffigai.

Imm. 3. Kommunimi ulluunerani paaqqinnittarfiit aamma ulluunerani paaqqinnittarfiit imminnut pigisut, kommunalbestyrelsimik ingerlatsinissamik isumaqatigiissusiorsimasut, kommunalbestyrelsimit malitassiarineqarsimasut naapertorlugit missingersuusiussapput. Ulluunerani paaqqinnittarfinni imminnut pigisuni sinnerini siulersuisut najoqqutassiaat naapertorlugit missingersuusiussapput.

§ 20. Ulluunerani paaqqinnittarfimmi aqutsisup akisussaaffigaa meeraq pillugu mappimik pappiaqqanik digitalimilluunniit pilersitsillunilu nutarterinissaq, kiisalu meeqqat meeqqerivimmiittut aqqinik inuullu normuinik, angajoqqaatut oqartussaasut pilersuisuisusalu aqqinik, meeqqerivimmiikkunnaarpatalu sooq aninerannut pissutaasut pillugit paasissutissanik allattuiffeqarnissaq. Takkuttarnermut nalunaarsuisarneq ingerlanneqassaaq.

Imm. 2. Kommunimi ulluunerani paaqqinnittarfiit aamma ulluunerani paaqqinnittarfiit imminnut pigisut, kommunalbestyrelsimit ingerlatsinermik isumaqatigiissuteqarfigineqarsimasut, takkuttarnermut nalunaarsuut persorsaanikkullu ukiumut pilersaarutit kommunalbestyrelsimut nassitissavaat ullup kommunalbestyrelsimit killiliunneqarsimasup qaanginninnerani.

§ 21. Atorfinititsinermik oqartussaasup ulluunerani paaqqinniffiup aqutsisuata allaffissornikkut §§ 18 aamma 19 naapertorlugit suliassanik isumaginninnginnissaa aalajangersinnaavaa, tamanna ulluunerani paaqqinnittarfiup aqqissuussaananerani pilersaarusiornieranilu suliassat agguataarneqarsimaneranni illersorneqarsinnaappat, aamma atorfinititsinermik oqartussaasup uppersarsinnaappagu perorsaanikkut, allaffissornikkut aqutsinikkullu suliassat naammaginartumik naammassineqartut. Kisianni atorfinititsinermik oqartussaasoq ulluunerani paaqqinnittarfimmi aqutsisup allaffissornikkut suliassanik isumaginninnginnissaanik aalajangersinnaanngilaq, atorfinititsinermik oqartussaasoq § 22, imm. 1 naapertorlugu perorsaanermik ilinniaqarnissamik piumasaqaammit immikkut akuersissuteqarsimappat.

Imm. 2. Ulluunerani paaqqinnittarfimmi aqutsisoq allaffissornikkut suliassanik isumaginninngippat inini sulisut amerlassusissaannut ilaatinneqassaaq.

§ 22. Ulluunerani paaqqinnittarfimmi aqutsisoq perorsaausutut ilinniarsimassaaq. Atorfilli perorsaausutut ilinniarsimasumit inuttalerneqarsinnaanngippat atorfinititsinermut oqartussaasoq perorsaausutut ilinniarsimanissamik piumasaqaammik atortitsinnginnissamik immikkut akuersissuteqarsinnaavoq, atorfirmut qinnuteqartoq ilinniakkamik allamik naleqquttumik inuussutissarsiornermiluunniit naleqquttumik misilittakkamik tunuliaqutaqarluni atorfirmut piukkunnaateqarpat.

Imm. 2. Ulluunerani paaqqinnittarfimmi aqutsisoq inini sulisut amerlassusilerneqarnerisa

avataanniippoq.

Imm. 3. Ulluunerani paaqqinnittarfinni kommuninit ingerlanneqartuni innersuussuteqarnerata kingorna kommunalbestyrelse aqutsisumik atorfinitsitsissaaq, takuuk § 18, imm. 2.

Kommunit ulluunerani paaqqinnittarfiini sulisut amerlassusilerneqarnerat

§ 23. Meeqqat eqimattat tamarmik immikkut sulisoqarnikkut amerlassusilerneqarsimassapput ikinnerpaamik perorsaasumik ataatsimik, perorsaasutut ilinniagalimmik ataatsimik ikiortimillu ataatsimik. Ilinniartut tapersersuisullu sulisut amerlassusilerneqarnerannut ilaatinneqanngillat.

Imm. 2. Kommunalbestyrelse ulluunerani paaqqinnittarfik suleqatigalugu aalajangersimasumik nalileereernermi sulisut amerlassusilerneqarnerannit utaqqiisaasumik immikkut akuersissuteqarsinnaavoq. Utaqqiisaasumik immikkut akuersissut qaammatit pingasut tikillugit sivilissuseqarsinnaavoq, kingornalu immikkut akuersissummik nalileeqqittoqassalluni.

Imm. 3. Ulluunerani paaqqinnittarfiup ammasarfiini meeqqani eqimattani tamani sulisut ikinnerpaamik marluussapput, pinerillu tamaasa ulluunerani paaqqinnittarfinni perorsaasoq ikinnerpaamik ataaseq sulissalluni.

Imm. 4. Ulluunerani paaqqinnittarfinni sulisut amerlassusilerneqarnerisa saniatigut igaffimmi eqqiaanermillu sulisoqassaaq.

Imm. 5. Kommunalbestyrelse imm. 1-4 aallaavigalugit ulluunerani paaqqinnittarfinni ataasiakkaani sulisut amerlassusissaannik aalajangersaassaaq aqutsisullu saniatigut sulisunik atorfinitsitsisarnernut najoqqutassiorluni.

Angajoqqaat siulersuisui

§ 24. Kommunalbestyrelse persorsaanikkut sulisut, meeqqap angajoqqaatut oqartussaasui pilersuisuisuisalu akornanni suleqatigiinneq siuarsarniarlugu ulluunerani paaqqinnittarfinni angajoqqaat siulersuisuinik pilersitsissaaq.

Imm. 2. Ulluunerani paaqqinnittarfinni kommuninit ingerlanneqartuni tamani ulluunerani paaqqinnittarfiup aqutsisua ukiumut ikinnerpaamik pingasoriarluni angajoqqaat siulersuisuinik ataatsimiigiaqqusissaaq.

Imm. 3. Angajoqqaat siulersuisuisa suliasaraat:

- 1) ulluunerani paaqqinnittarfinni sammisassanik suliniutinilluunniit siunnersuuteqarlunilu aaqqissuussineq,
- 2) perorsaanikkut ukiumut pilersaarusoqataaneq,
- 3) perorsaanikkut ukiumut pilersaarutinik ukiumut marloriarlutik malitseqartitsineq kiisalu ulluunerani neqeroorummi meeqqat pisariaqartitaannut naleqqussaaneq, aamma
- 4) illumi aaqqissuussinermik allannguinemillu siunnersuuteqarneq.

Imm. 4. Angajoqqaat siulersuisui ataatsimiinnerni tamani imaqarniliortassapput,

ataatsimiinnerup kingorna kommunalbestyrelsimut imaluunniit paaqqinnittarfimmi imminut pigisumi siulersuisunut tunniunneqartussamik.

Imm. 5. Naalakkersuisut angajoqqaat siulersuisui pillugit malittarisassanik erseqqinnerusunik aalajangersaasinnaapput.

Ulluunerani paaqqinnittarfiit imminnut pigisut aqunneqarnerat

§ 25. Ulluunerani paaqqinnittarfimmi imminnut pigisuni pingaarnertut aqutsisussanik siulersuisunik pilersitsisoqassaaq.

Imm. 2. Ulluunerani paaqqinnittarfimmi imminnut pigisuni ulluunerani paaqqinnittarfimmi aqutsisoq ulluunerani paaqqinnittarfiup siulersuisuanit atorfinitsinneqassaaq. Siulersuisut sulisut sinnerinik atorfinitsitsinermut najoqutassiussapput.

Kapitali 4

Angerlarsimaffimmi paarsineq

Angerlarsimaffimmi paarsisartunik angerlarsimaffimmilu paarsisarfinnik akuersineq

§ 26. Kommunalbestyrelse angerlarsimaffimmi paarsisartut angerlarsimaffimmilu paarsisarfiup qinnuteqaateqareernerisa kingorna allakkatigut akuersissuteqareerpat, aatsaat angerlarsimaffimmi paarsisartut imaluunniit angerlarsimaffimmi paarsisarfik meeqqanik tigusaqarsinnaapput.

Imm. 2. Angerlarsimaffimmi paarsisartup timikkut tarnikkullu pisinnaassuseqarnissaa perorsaanikkullu uummarissaataasunik sammisassaqaqtitsinernik neqerooruteqarnissamut piginnaasaqarnissaa imm. 1 naapertorlugu akuersinissamut piunasaqaatigineqarpoq. Angerlarsimaffimmi paarsisartuq pineqartullu illoqatigisinnaasai tamarmik peqqissutsimut nalunaarummik qaammatinit pingasunit pisoqaanerunngitsumik takutitsisinnaassapput.

Imm. 3. Angerlarsimaffimmi paarsisarfik akuerineqarsinnaanngilaq:

- 1) angerlarsimaffimmi paarsisartup taassumaluunniit inoqutaasa ilaasa, meeqqanik paarsinermi ikiuuttussat, pineqaatissinneqarsimannginnermik uppernarsaataanni takuneqarsinnaappat, pineqartoq ukiut kingulliit 10-t iluanni ilaqutariissutsip iluani pinerluuteqarsimasutut, kinguaassiutitigut pinerluuteqarsimasutut imaluunniit inummut navianaatilimmik pinerluuteqarsimasutut eqqartuunneqarsimappat,
- 2) angerlarsimaffimmi paarsisartup taassumaluunniit inoqutaasa ilaasa meeqqanik pinerliisimannginnermut uppernarsaataanni takuneqarsinnaappat, pineqartoq ilaqutariissutsip iluani pinerluuteqarsimasutut imaluunniit kinguaassiutitigut pinerluuteqarsimasutut eqqartuunneqarsimappat.
- 3) angerlarsimaffimmi paarsisarfinni tuniluuttartumik nappaateqartoqarpat.

Imm. 4. Angerlarsimaffimmi paarsineq tamanit katersuuttarfimmi ingerlanneqarpat aalajangersakkani imm. 2, oqaaseqatigiit aappaat aamma imm. 3 angerlarsimaffimmi paarsisartumut taamaallaat atuutissaaq.

Imm. 5. Angerlarsimaffimmi paarsisarfiup meeqqamik tiguisinnaanissaanut

namminerisamik angerlarsimaffiup tamanilluunniit katersuuttarfiup akuerineqannginnerani illumi atukkat kommunalbestyrelsimit nalilersorneqaqqaassapput.

Imm. 6. Kommunalbestyrelse naliliippat, angerlarsimaffimmi paarsisartumut angerlarsimaffinnullu paarsisarfiusunut akuersissummut piunasaqaatit naammassineqarsinnaajunnaarsimasut, akuersissut utaqqiisaagallartumik atorunnaarsinneqassaaq imaluunniit pisariaqanngitsumik utaqqissussinatik atorunnaarsinneqassaaq.

Angerlarsimaffimmi paarsinermik ingerlatsineq

§ 27. Kommunalbestyrelse angerlarsimaffimmi paarsisarnissamik qinnuteqartumut meeqqanik sulii atualerneqanngitsunik katillugit sisamanik paarsisarnissaanut akuersissuteqarsinnaavoq. Angerlarsimaffimmi paarsisarfiimmi nammineq meerarisat arfinillit inorlugit ukiullit meeqqallu angerlarsimaffimmi paarisartakkat tallimanit amerlanerussanngillat.

Imm. 2. Angerlarsimaffimmi paarsisartuq ullunik 14-inik killilerlugu amerlanerusunik paarsaqarsinnaavoq imaluunniit angerlarsimaffimmi paarsisartumut allamut taartaalluni.

Imm. 3. Angerlarsimaffimmi paarsisartuq qaammatit pingasut iluanni amerlanerpaamik marloriarluni amerlavallaanik paarsaqarsinnaavoq imaluunniit angerlarsimaffimmi paarsisartumut allamut taartaalluni.

Kommunit angerlarsimaffinni paarsisartuinut angajoqqaat siulersuisui

§ 28. Angerlarsimaffinni paarsisartuni tamani angerlarsimaffimmi paarsisartuq angajoqqaat siulersuisuinik ukiumut ikinnerpaamik pingasoriarluni aggersaasassaaq. Angajoqqaat siulersuisui meeqqap angajoqqaatut oqartussaasuunik, pilersuisuisuinik aamma angerlarsimaffimmi paarsisartumik inuttaqarput. Najugaqarfimmi ataatsimi angerlarsimaffimmi paarsisartut arlaqarpata angerlarsimaffimmi paarsisartunut tamanut ataatsimoorussamik angajoqqaat siulersuisuinik pilersitsisoqarsinnaavoq.

Imm. 2. Angajoqqaat siulersuisuisa suliiassaraat:

- 1) meeqqanut, soorlu aamma angajoqqaatut oqartussaasunut imaluunniit pilersuisuisusunut tunngatillugu anguniagalimmik sulinerlut atillugu angerlarsimaffimmi paarsisarfiimmi sammisassanik iliuusissanillu siunnersuuteqarneq aqqissuussinerlu, aamma tassunga ilanngullugu
- 2) pissutsit meeqqat angerlarsimaffimmi paarsisarfiusumi ulluinnarisaannut ersarissumik pingaaruteqartut pillugit aalajangiinerit.

Imm. 3. Angajoqqaat siulersuisui ataatsimiinnerni tamani imaqarniliortassapput, ataatsimiinnerup kingorna kommunalbestyrelsimut tunniunneqartussamik.

Kapitali 5

Immikkut ittumik sammisassaqartitsinissamut neqeroorutit

§ 29. Kommunalbestyrelse meeqqanut sulii atualinngitsunut, ulluunerani paaqqinnittarfimmiinneq ajortunut imaluunniit angerlarsimaffimmi paarineqarneq ajortunut sammisasaqartitsinernik neqeroorteqassaaq. Sammisasaqartitsinissanut neqeroorutitut taakkununga peqataanermut akiliuteqarnissamik piunasaqartoqassanngilaq.

Imm. 2. Sammisasaqartitsinissamik neqeroorutit tassaapput piffissap ilaa neqeroorutit, meeqqanut sulii atualinngitsunut inersimasumik ilaqlarluni, meeqqap inerikkiartorfissaasa ataatsip arlallilluunniit iluanni anguniagaqartumik sammisasaqartitsinermik imaqtartut, ukiuanut naleqquttut.

Imm. 3. Sammisasaqartitsinermik neqeroorutit pilersitsinermut aallartitsinermullu ataqtatigiissaarisumik toqqaanissamut kommunalbestyrelse pisussaaffeqarpoq. Ataqtatigiissaarisoq najukkami peqtatigiiffinnik, inunnik isumalluutit allanillu naapertuuttunik suliamik ilisimasalinnik suleqateqassaaq.

Kapitali 6

Ataatsimut aalajangersakkat

Meeqqap inerikkiartornera atugarissaarneralu

§ 30. Ulluunerani neqeroorut meeqqat ataasiakkaat ineriartornerannik atugarissaarnerannillu tamakkiisumik naliliineq aallaavigalugu ataavartumik nalilersuillunilu uppersaasiortassaaq ukiumullu ikinnerpaamik marloriarluni ineriartornermik nassuiaasiortassaaq.

Imm. 2. Ineriartornermik nassuiaatit angajoqqaatut oqartussaasut, pilersuisuisut naapertuuttumillu suliamik ilisimasallit suleqatigalugit malitseqartinneqartassapput.

Imm. 3. Ulluunerani neqeroorut meeqqap ineriartornerata ingerlaqqinnissaa pillugu suleqatigiinnissaq siunertaralugu angajoqqaatut oqartussaassusilinnik aamma imaluunniit pilersuisuisunik ukiumut ikinnerpaamik marloriarluni oqaloqateqartarnissamik pisussaaffeqarpoq.

§ 31. Meeqqap ulluunerani neqeroorummit ulluunerani neqeroorummut allamut nuunnerani meeqqap isumassorneqarneranik pisariaqartitaanillu isumaginninnissamut atorneqartussanik ulluunerani neqeroorummi qimalikkami sulisut ulluunerani neqeroorummi nuuffissami sulisunik suleqateqassapput meerarlu pillugu paasissutissanik naapertuuttunik ingerlatitseqqillutik.

Imm. 2. Naalackersuisut paasissutissanik naapertuuttunik ingerlatitseqqinnermi malittarisassanik aalajangersaassapput.

Misissuineq siusissukkullu iliuuseqarneq

§ 32. Kommunalbestyrelse meeraq pingasunik ukioqalerpat peqqissusaanik ineriartorneranillu pinngitsoorani misissuissaaq. Misissuineq Naalackersuisunit ineriartortinneqartut takussutissat, nakkutilliinermut nalilersuinerimullu atortut tunngavigalugit ingerlanneqassaaq.

Imm. 2. Misissuineq ilaatigut tullinnguuttunik imaqassaaq:

- 1) Timimik aqutsisinnaaneq.
- 2) Inooqataanermi ilisarsisinnaaneq.
- 3) Peqqissutsikkut atukkat.
- 4) Pissusilersorneq tapersersorneqarnissamik neqerooruteqarnermut pissutissaqartitsisinnaasoq.
- 5) Ilaqutariit aamma attaveqarfiit.

Imm. 3. Naalakkersuisut meeraq pingasunik ukioqalerpat misissuinissamut siusissukkullu iliuseqarnissamut malittarisassanik erseqqinnerusunik aalajangersaasinnaapput.

§ 33. Kommunalbestyrelse meeraq tallimanik ukioqalerpat atualernissamut piareersimaneranik pinngitsoorani misissuissaaq. Misissuineq Naalakkersuisunit ineriartortinneqartut takussutissat, nakkutilliinermut nalilersuinernullu atortut tunngavigalugit ingerlanneqassaaq.

Imm. 2. Misissuineq ilaatigut tullinnguuttunik imaqassaaq:

- 1) Timimik aqutsisinnaaneq.
- 2) Inooqataanermi ilisarsisinnaaneq.
- 3) Peqqissutsikkut atukkat.
- 4) Pissusilersorneq tapersersorneqarnissamik neqerooruteqarnermut pissutissaqartitsisinnaasoq.
- 5) Oqaatsit.
- 6) Imminut ikiorsinnaaneq.

Imm. 3. Naalakkersuisut meeraq tallimanik ukioqalerpat misissuinissamut siusissukkullu iliuseqarnissamut malittarisassanik erseqqinnerusunik aalajangersaasinnaapput.

Perorsaanikkut tarnikkullu atukkatigut siunnersuineq

§ 34. Kommunalbestyrelse meeqqanut pitsaanerpaaq qulakkeerniarlugu ulluunerani neqeroorutitut, angajoqqaatut oqartussaasunut pilersuisuisuinullu perorsaanikkut tarnikkullu atukkatigut siunnersuineramik isumaginnissaaq.

§ 35. Naalakkersuisut meeqqat suli atualinngitsut pillugit suliassaqarfimmi perorsaanikkut tarnikkullu atukkatigut ilisimatusarnermik isumaginnissapput.

Ineriartorneq misileraallunilu aaqqiissutit

§ 36. Naalakkersuisut meeqqanut ulluunerani neqeroorutit nutaanik ilusilinnik ineriartortitsissapput, tamatumunnga ilanngullugu meeqqanut ulluunerani neqeroorutit allaanerusut najugaqarfimmi atukkanut naleqqussarneqarsimasut.

Imm. 2. Naalakkersuisut ulluunerani neqeroorutit perorsaanikkut sulineq pillugu najoqqutassanik ineriartortitsissapput.

§ 37. Naalakkersuisut kommunalbestyrelsip innersuussinera malillugu kommunimi meeqqanut sulī atualerneqanngitsunut ulluunerani neqeroorutit pillugit misiliilluni aaqqiissuteqarnissamik akuersissuteqarsinnaapput.

Imm. 2. Kommunimi misiliilluni aaqqiissut sivisunerpaamik ukiuni pingasuni atuussinnaavoq.

Imm. 3. Imm. 1 naapertorlugu kommunimi misiliilluni aaqqiissuteqarnermut atatillugu kommunalbestyrelse ukiut tamaasa nassuiaasiortassaaq Naalakkersuisunut tunniunneqartussamik.

§ 38. Naalakkersuisut kommunalbestyrelse suleqatigalugu perorsaariaatsit allaffissornikkullu suleriaatsit atuuttut pitsanngorsarnissaat siunertaralu ataqatigiissumik aaqquissuussinernik sakkunillu misiliilluni aaqqiissutinik pilersitsisinnaavoq.

Imm. 2. Misiliilluni aaqqiissut sivisunerpaamik ukiuni pingasuni atuussinnaavoq. Misiliilluni aaqqiissut pineqartoq sivisunerpaamik ukiunik marlunnik sivitsorneqarsinnaavoq.

Imm. 3. Imm. 1 naapertorlugu kommunimi misiliilluni aaqqiissuteqarnermut atatillugu ukiut tamaasa nalunaarusiortoqartassaaq Naalakkersuisunut tunniunneqartussamik.

Kisitsisitigut paasissutissat

§ 39. Kisitsisitigut paasissutissanik suliaqarnissamut atatillugu Naalakkersuisut noqqaassutaannik kommunalbestyrelse paasissutissanik nassiussinissamut pisussaaffeqarpoq.

Imm. 2. Kisitsisitigut paasissutissat assigisaallu qanoq annertutiginissaannut Naalakkersuisut malittarisassanik aalajangersaasinnaapput, imm. 1 naapertorlugu nassiunneqartussanik, aamma qanoq nutarterneqartarnersut nassiunneqartarnersullu pillugu.

Tamakkiisumik akisussaaffik

§ 40. Kommunalbestyrelse kommunimi meeqqat inuusuttullu pillugit politikiliussaaq.

Imm. 2. Kommunalbestyrelse inoqarfinni anginerni minnernilu meeqqanut ulluunerani neqeroorutit akornanni perorsaaniikkut isumassarsiornissaq siunertaralugu aalajangersimasumik attaveqarfissamut ilisimasanik ingerlatitseqqittassaaq.

Imm. 3. Kommunalbestyrelsip ulluunerani neqeroorutinut ataasiakkaanut perorsaaniikkut ukiumut pilersaarutinik suliaqarnissaq tamatumunngalu nalilersuinissaq pingaarnertut akisussaaffigaa.

Imm. 4. Assersuutigalugu meeqqap ilinniarniarneranut, ineriartorneranut imaluunniit inuttut ajornartorsiutaanut tunngatillugu immikkut suliniuteqarnissap pisariaqartinneqaratarsinnaanera eqqarsaatigalugu iliuseqapallannissap tunngavilerneqarnissaanut meeqqallu malinnaaviginissaanut atatillugu kommunalbestyrelsip ulluunerani paaqqinnittarfiup aqutsisuata meeqqanut ataasiakkaanut tamanut digitalimik imaluunniit tigussaasumik mappinik pilersitsinissaa nutarterinissaalu qulakkiissavaa. Tamatuma kingorna meeqqap mappia atuarnarup aallartinneranut atatillugu atuartup atuarfianut nuunneqassaaq.

Nakkutilliineq

§ 41. Naalakkersuisut meeqqanut suli atualerneqanngitsunut perorsaanikkut inerikkiartuutaasunik ulluunerani neqeroorutininik pingaarnertut nakkutilliissapput.

§ 42. Kommunalbestyrelse oqartussaasut naapertuuttut suleqatigalugit meeqqanut ulluunerani neqeroorutininik tamanik nalinginnaasumik persorsaanikkullu nakkutilliissaaq.

Imm. 2. Ulluunerani neqeroorutininik tamanik nakkutilliineq ukiumut ikinnerpaamik pingasoriarluni ingerlanneqartassaaq, taakkunannga ukiumut ikinnerpaamik ataaseq nalunaaqqaarani nakkutilliinerussalluni.

Imm. 3. Kommunalbestyrelse annertusisamik nakkutilliissaaq, ulluunerani neqeroorummi perorsaanikkut ilikkartitsinissamut avatangiisit pitsaassusaat pissutsilluunniit allat ernumassutissaqalersitsisutut nalilerneqarpata.

Imm. 4. Kommunalbestyrelse annertusisamik nakkutilliissaaq iliuusissatullu pilersaarusiortuni ulluunerani neqeroorummi perorsaanikkut ilikkartitsinissamut avatangiisit pitsaassusaat pissutsilluunniit allat ernumanartorujussuurtut nalilerneqarpata. Annertusisamik nakkutilliineq iliuusissatullu pilersaarusiorteq pissutsit ernumanartorujussuit paasineqarpata ingerlaannaq ingerlanneqassapput.

Imm. 5. Iliuusissatut pilersaarut ulluunerani neqeroorummi aqutsisoq oqaloqatigalugu suliarineqassaaq ulluuneranilu neqeroorummi perorsaanikkut ilikkartitsinissamut avatangiisit pitsaassusaat pissutsilluunniit allat pitsanngorsarnissaannut qanoq sulisoqassaneraniq qanorlu malitseqartitsisoqassaneraniq nassuiaassalluni. Angajoqqaat siulersuisui iliuusissatut pilersaarut pillugu ilisimatinneqassapput oqaaseqaateqarnissamullu periarfissaqassallutik. Angajoqqaat siulersuisuinik ilisimatitsineq sukkanerpaaq atorlugu isumagineqassaaq angajoqqaallu siulersuisuisa oqaaseqaatigisinnaasaat sukkanerpaaq atorlugu tunniunneqassapput.

Imm. 6. Naalakkersuisut kommunalbestyrelsip kommunimi ulluunerani neqeroorutininik tamanik nalinginnaasumik persorsaanikkullu nakkutilliinera pillugu malittarisassanik erseqqinnerusunik aalajangersaasinnaapput.

Aningaasalersuineq

§ 43. Ulluunerani paaqqinnittarfinnut, angerlarsimaffinni paarsisarfinnut immikkullu sammisaqartitsinissamik neqeroorutininut aningaasartuutit Inatsisartut inatsisaat manna naapertorlugu kommuninit akilerneqassapput, taamaattoq takuuk § 44.

Imm. 2. Namminersortlutik Oqartussat ulluunerani paaqqinnittarfiit pilersinnerinut tapiissuteqarsinnaapput.

§ 44. Kommunalbestyrelse kommunimi meeqqat suli atualinngitsut ulluunerani neqeroorutinininnerinut akileeqqusisinnaavoq. Akiliutissaaq aalajangerneqassaaq, kommunimi

meeqqanut suli atualinngitsunut ulluunerani neqeroorutitut kommunip aningaasartuutai akiliisussaataasullu aningaasaqarnikkut atugarisai imaluunniit atugarisaat tunngavigalugit.

Imm. 2. Meeqqanut suli atualinngitsunut kommunimi ulluunerani neqeroorutitut atuinermut akiliisussaataaneq meeqqap pilersuisuisuaniippoq imaluunniit pilersuisuisuiniipput.

Imm. 3. Naalakkersuisut imm. 1 aamma 2 naapertorlugit meeqqat meeqqanut suli atualinngitsunut kommunip ulluunerani neqeroorutaaniinneritut akiliutissat pillugit malittarisassanik aalajangersaasinnaapput, tamatumunnga ilanngullugit isertitanut naleqqussaanerit, akiliutissanik kinguaattoortoqartillugu meeqqamik anisitsisinnaaneq, aamma kommunimi meeqqanut ulluunerani neqeroorutitut atorunnaarsitsineq nalunaaruteqartarnerlu pillugit aalajangersakkat.

Naammagittaalliorsinnaaneq

§ 45. Isumaginnittoqarfiup aqunneqarnera aaqqissuussaanelu pillugit Inatsisartut peqqussutaanni aalajangersakkat malillugit kommunalbestyrelsip aalajangiineri pillugit § 8 aamma § 26 naapertorlugit Isumaginninnermi Naammagittaalliuuteqartarfimmut naammagittaalliuutigineqarsinnaapput.

Imm. 2. Inatsisartut inatsisaanni matumani aalajangersakkat allat malillugit kommunalbestyrelsip aalajangiineri allaffissornikkut oqartussaasumut allamut naammagittaalliuutigineqarsinnaanngillat.

Imm. 3. Malittarisassat Inatsisartut inatsisaannit matumunnga tunngavilimmik suliaasut malillugit kommunalbestyrelsip aalajangiineri allaffissornikkut oqartussaasumut allamut naammagittaalliuutigineqarsinnaanngillat.

Atuutilernera

§ 46. Inatsiartut inatsisaat una ulloq 1. januaari 2024 atuutilissaaq.

Imm. 2. Ilutigitillugu Meeqqanut suli atualinngitsunut perorsaaniikkut inerikkiartuutaasunik ulluunerani neqeroorutitut pillugit Inatsisartut inatsisissaattut siunnersuut nr. 16, 3. december 2012-meersoq atorunnaassaaq.

Imm. 3. Imm. 2-mi taaneqartoq Inatsisartut inatsisaat naapertorlugu aalajangersakkat atuutilersinneqarsimasut imaluunniit attanneqartut inatsit una imaluunniit Inatsisartut inatsisaat alla naapertorlugu tunngavilerneqartunik taarserneqarnissaasa atorunnaarsinneqarnissaasaluunniit tungaannut atuutissapput.”

Siunnersuummut oqaaseqaatit

Oqaaseqaatit nalinginnaasut

Inatsisartut inatsisaata kalaallisuuata danskisuuatalu oqaatsitigut naapertuuttunngortinneqarnissaasa qulakkeerneqarnissaat allannguutissatut siunnersuummi siunertarineqarpoq.

Ataatsimiititaliap ukuninnga allannguissamut inassuteqarneratigut allannguutissatut siunnersuummi ilanngunneqarput: § 2, nr. 7, § 18, imm. 3, nr. 1, § 18 imm. 3, nr. 2, § 26, imm. 3, nr. 1 kiisalu § 26, imm. 3, nr. 2.

Inatsisissatut siunnersuummi aalajangersakkanut ataasiakkaanut oqaaseqaatit

Nr. 1-imut

Allannguutissatut siunnersuummi oqaaseqaatit nalinginnaasut innersuussutigineqarput.